



## Wenye Hekima Wamkaribisha

Yesu alipozaliwa katika Bethlehemi ya Uyahudi zamani za mfalme Herode, tazama, mamajusi wa mashariki walifika Yerusalemu, wakisema, Yuko wapi yeye aliyezaliwa mfalme wa Wayahudi?—**Mathayo 2:1, 2.**

Mfalme wa utukufu alishuka chini kuuchukua ubinadamu; na malaika waliokuwa wameshuhudia fahari Yake kwenye nyua za kimbingu, alipokuwa akiabudiwa na majeshi ya kimbingu, walivunjika mioyo walipomwona Kamanda wao wa kimbingu katika nafasi dhalili kiasi hicho.

Wayahudi walikuwa wamejitenga wenyewe mbali sana na Mungu... kiasi cha malaika kutokuwasiliana nao juu ya habari njema za ujio wa Mkombozi kama mtoto mchanga. Mungu akachagua Watu wenye Hekima wa Mashariki ili watende mapenzi Yake...

"Mamajusi wa mashariki walifika Yerusalemu, wakisema, Yuko wapi yeye aliyezaliwa mfalme wa Wayahudi? Kwa maana tuliiona nyota yake mashariki, nasi tumekuja kumsujudia." Hawa watu hawakuwa Wayahudi; lakini walikuwa wakimsubiri Masihi aliyetabiriwa. Walikuwa wamejifunza unabii, nao wakajua kuwa wakati ulikuwa umewadia ambapo Kristo alikuwa aje; hivyo walikuwa wakitazama kwa shauku ishara fulani ya tukio hilo kuu, ili wapate kuwa kati ya watu wa kwanza kumkaribisha mtoto mchanga aliye Mfalme wa kimbingu na kumwabudu.

Watu hawa wenye Hekima walikuwa wanafalsafa, na walikuwa wamejifunza kazi za Mungu katika viumbe asili. Katika maajabu ya mbingu, katika utukufu wa jua, mwezi na nyota, walikiona kidole cha Mungu. Hawa hawakuwa waabudu sanamu. Waliishi kulingana na nuru lau ndogo iliyowaangazia... Hawa wenye Hekima waliona mbingu ikiangaziwa kwa nuru, iliyowafunika jeshi la mbinguni lililoshangilia ujio wa Kristo kwa wale wachunga kondoo wanyenyekevu. Na baada ya malaika kurudi mbinguni, nyota yenye mng'ao ilitokea na kudumu kwa muda katika anga.

Nuru hii ilikuwa ni kundi la malaika waliokuwa waking'aa wakiwa mbali, ambao mwonekano wao ulikuwa kama nyota iliyong'aa. Mwonekano usio wa kawaida wa nyota hii kubwa yenye mng'ao ambayo hawakuwa wamewahi kuiona kabla, ikining'inia kama ishara katika mbingu, ilivutia ufuatiliaji wao. Hawakupata fursa adhimu ya kusikia tangazo la malaika kwa wale wachungaji wa kondoo. Lakini Roho wa Mungu aliwagusa kumtafuta huyu Mgeni wa kimbingu aliyeuja ulimwengu ulioanguka dhambini. Hawa wenye Hekima walichukua mwelekeo kulingana na jinsi nyota ilivyoonekana kuwaongoza. Nao walipolikaribia jiji la Yerusalemu, nyota ile ilifunikwa na giza, nayo haikuendelea kuwaongoza...

Wenye Hekima hawa walishangaa kuona hali ya kutokuwa na shauku kubwa kuhusu suala la ujio wa Masihi.... Hawa wenye Hekima walitaja wazi nia ya safari yao. Walikuwa wakimtafuta Yesu, Mfalme wa Wayahudi, kwani walikuwa wameiona nyota Yake mashariki na walikuwa wamekuja ili kumwabudu Yeye...

Ujio wa Kristo lilikuwa ndilo tukio kuu kuliko yote tangu uumbaji wa dunia... Jicho la Mungu lilikuwa juu ya Mwana Wake kila wakati... Zawadi walizoletewa [Yusufu na Mariamu] na wenye Hekima ziliwasaidia kukidhi mahitaji yao wakiwa katika nchi [ya Misri] (The Review and Herald, Desemba 24, 1872).